



Gosoota Ibaadaa Ragaa waliin-Kutaa 3

Description

Kutaa darbe keessatti gosoota ibaadaa hamma ta'ee ragaa waliin ilaalle jirra. Har'as itti fufuun hamma ta'e ni ilaalla:

11-Du'aayi

Du'aayin (kadhaan) ibaadaa hundarra guddaa ta'eedha. Gosoota ibaadaa kutaa darbe keessatti ilaalle hunda of keessatti hammata. Rabbiin subhaanahu wa ta'alaa ni jedha:

وَقَالَ رَبُّكُمْ أَدْعُونِي أَسْتَجِبْ لَكُمْ إِنَّ الَّذِينَ يَسْتَكْبِرُونَ عَنْ
عِبَادَتِي سَيَدِ الْخُلُونَ جَهَنَّمَ دَاخِرِينَ

٦٠

“Gooftan keessan ni jedhe, ‘Na kadhaa isiniifan awwaadhaa. Dhugumatti, isaan Ana gabbaruu irraa boonan, salphattoota ta'anii Jahannam seenuf jiru.’” Suuratu Ghaafir 40:60

“**isiniifan awwaadhaa.**” Kana jechuun du'aayi (kadhaa) keessan isiniif deebisa. Namoonni ibaadaadhaan Ana tokkichoomsu irraa of tuulan, salphattoota fi xiqaattota ta'anii Jahannamiin ni seenu.

Hadiisa keessattis, “**Du'aayin ibaadadha.**” Jechuun dhufee jira. ([Sunan Abu Daawud 1479](#))

Namni wanta Rabbiin malee eenyullee hojjachuu hin dandeenye argachuuf Rabbiin ala wanta biraan kadhate, inni mushrika kaafira ta'a. Namni kadhatamu jiraataa ta'i du'aa ta'ii tokkoma. Namni nama lubbuun jiru wanta inni danda'u irratti yoo kadhate, kuni rakkoo hin qabu. Fakkeenyaaaf, “yaa ebalu na nyaachisi, yaa ebalu na obaasi” yoo jedhe, homtu isarra hin jiru. Garuu kadhaa akkanaatin nama du'ee ykn nama fagoo jiruu yoo kadhate, inni shirkii hojjatee jira. Sababni isaas, namni du'e ykn fagoo jiru wanta inni kadhate kana hojjachuu hin danda'u. Nama kana kadhachuu “samii fi dachii keessatti

namni du'ee ykn fagoo jiru too'anna qaba" jedhee amanuu isaa agarsiisa. Sababa kanaan nama shirkii hojjate ta'a.

Rabbiin subhaanahu wa ta'aalaa ni jedha:



فَادْعُوا اللَّهَ مُخْلِصِينَ لِهِ الدِّينَ وَلَا كَرِهُ الْكُفَّارُونَ

“Osoo kaafironnii jibbaniillee, amantii Isaaf qulqulleessuun Rabbiin kadhaa.” Suuratu Ghaafir 40:14

Yaa warra amantan Rabbii tokkichaaf ibaadaa fi du'aayi qulqulleessaa. Mushrikoota adeemsa isaanii keessatti faallessaa. Osoo kuni isaan dallansiiseyyuu, isaaniif dantaa hin kenninaa.[\[1\]](#)

Gosoota ibaadaa keessaa kan biraa “**rajaa'a (abdachuu)**” dha. Abdachuu jechuun namni dhimma dhiyoo dhaqqabuu danda'an argachuuf dharra'uudha. Tarii dhimmi kuni fagoo ta'uu danda'a garuu dhiyoo akka ta'etti ilaalun abdatamu danda'a. Abdachuun of gadi xiqaessu fi of gadi qabuu of keessatti qabatee Rabbii olta'aaf malee hin ta'u. Rabbiin ala wanta biraatiif yoo godhame shirkiidha. Haala qalbii namtichaa irratti hundaa'e tarii shirkii guddaa ykn shirkii xiqaas ta'uu danda'a.

Ammas, gosoota ibaadaa keessaa tokko **ragbata (kajeelu)**dha. Kajeellaan of gadi qabuu fi of xiqaessu of keessaa qabu Rabbii olta'aaf malee homaafu hin ta'u.

12-Al-Mahabbah (Jaalala)

Ammas gosoota ibaadaa keessaa tokko Al-Mahabbah (Jaalala)-Rabbiin subhaanahu wa ta'aalaa ni jedha:

﴿وَمِنَ النَّاسِ مَن يَتَّخِذُ مِن دُونِ اللَّهِ أَنْدَادًا يُحِبُّونَهُمْ
كَحُبِّ اللَّهِ وَالَّذِينَ عَامَنُوا أَشَدُ حُبًّا لِّلَّهِ﴾

“Namoota keessaa namoota Rabbii gadiitti andaada godhatanii akka jaalala Rabbii jaallatantu jira. Garuu warri amanan [isaan] caalaa sirritti Rabbiin jaallatu.” Suuratu Al-Baqarah 2:165 (Andaada jechuun qixxaattota (equals), dorgomtoota.)

Jaalalli ibaadaa ta'u jaalala jaallatamaaf of xiqaessu fi gadi of qabuun keessa jiruudha. Kuni Rabbii olta'aaf malee homaafu hin ta'u.

Sheykhul Islaam ibn Taymiyah (rahimahullahu) ni jedha: “Ibaadan itti ajajaman hiika xiqaenyaa fi hiika jaalalaa of keessatti kan qabateedha. Ibaadan jaalala fiixee dhuma irra gaheen Isa jaallachuu waliin Rabbii olta'aaf of xiqaessu fiixee dhuma irra gahe of keessatti qabata. (Kana jechuun ibaadaan Rabbii olta'aa garmalee jaallachuu waliin Isaaf garmalee of gadi xiqaessu of keessatti hammata.)

Dhugumatti sadarkaalee jaalalaa keessaa inni dhumaan gabbaruudha. Sadarkaan jalqabaa jaalalaa, itti rarra'uudha. Qalbiin jaallatamatti rarraati. Ergasii dharra'uudha. Itti aanee "al-gharaam"-kana jechuun jaalala qalbitti maxxanee fi irraa addaan hin baane. Ergasii Al-Ishq (garmalee jaallachuu). Marsaan jaalalaa isa dhumaan, "at-tatayyum" Kana jechuun gabbaruudha. Ni jedhama: taymullahi kana jechuun Gabricha Rabbii. (Hundeen jecha tatayyum jedhu, jecha isaanii kana irraayyi: "tayyamahul-hubbu" kana jechuun jaalalli isa gabroomse, gadi xiqqeesse.)

Namni nama tokko osoo jibbu gadi of qabeef, isaaf gabricha hin ta'u. Akkasumas, wanta tokko jaallattee garuu yoo isaaf gadi of hin qabin, wanta kanaaf gabricha hin ta'u. Kan akka ilma isaa, hiriyyaa isaa jaallachu. (Namoota kanniin ni jaallata garuu isaaniif gadi of hin qabu. Kanaafu, isaaniif gabricha hin ta'u jechuudha).

Kanaafi, Rabbiin gabbaruu keessatti isaan lamaan (jaalalaa fi gadi of qabuu) keessaa tokko qofti gahaa miti. Kana irra, Rabbiin subhaanahu wantoota hunda caalaa gabricha biratti jaallatamaa ta'uu fi wantoota hunda caalaa isa biratti Rabbiin guddaa ta'uu qaba. Dhugumatti, jaalallii fi gadi of xiqqessuun guutuun Rabbiif malee hin ta'u.[\[2\]](#)

Kanaafu, jaalalli jaallatamaaf of gadi qabuu fi of xiqqessu of keessaa qabu Rabbii tokkicha qofaaf ta'a. Isaan ala wanta biraatiif jaalala akkanaa gochuun shirkiidha.

13-Nafsee fi qabeenyaan karaa Rabbii keessatti qabsaa'u

Nafsee fi qabeenyaan karaa Rabbii keessatti qabsaa'un ibaadadha. Rabbiin subhaanahu wa ta'aalaa ni jedha:

﴿يَا يَهَا الَّذِينَ ءَامَنُوا هَلْ أَدُلُّ كُمْ عَلَى تِجَارَةٍ تُنْجِيُّكُمْ مِّنْ عَذَابٍ
أَلَيْمٌ ١٠﴾ تُؤْمِنُونَ بِاللَّهِ وَرَسُولِهِ وَتُجَاهِدُونَ فِي سَبِيلِ اللَّهِ بِأَمْوَالِكُمْ
وَأَنفُسِكُمْ ذَلِكُمْ خَيْرٌ لَّكُمْ إِنْ كُنْتُمْ تَعْلَمُونَ ۝ ۱۱﴾

"Yaa warra amantan! Daldala azaaba (adabbii) laalessaa irraa isin baraarutti isin qajeelchuu? Rabbiin fi Ergamaa Isaatti ni amantu, karaa Rabbii keessatti qabeenya keessanii fi nafsee teessaniin ni qabsooftu. Yoo kan beektan taatan, kanatu isiniif caala." Suuratu As-Saff 61:10-11

Yaa warra Rabbiin fi Ergamaa Isaa dhugoomsitan! Daldala azaaba garmalee nama dhukkubsuu irraa isin baraarutti isin qajeelchuu? Daldalli kunis: Rabbiin fi Ergamaa Isaatti amanuu itti fuftu, diinii Isaa gargaaruuf qabeenya fi nafsee qabdaniin karaa Rabbii keessatti ni qabsooftu. Miidhaa fi faayda wantootaa kan beektan yoo taatan, daldala addunyaa caalaa daldala kanatu isiniif caala. Itti aanee bu'aa daldala kanaa ni dubbata:

﴿يَغْفِرُ لَكُمْ ذُنُوبَكُمْ وَيُدْخِلُكُمْ جَنَّتٍ تَجْرِي مِنْ تَحْتِهَا
الْأَنْهَرُ وَمَسَكِنَ طَيِّبَةً فِي جَنَّتٍ عَدْنٍ ذَلِكَ الْفَوْزُ الْعَظِيمُ﴾
﴿وَأُخْرَى تُحِبُّونَهَا نَصْرٌ مِّنَ اللَّهِ وَفَتْحٌ قَرِيبٌ وَبَشِّرُ الْمُؤْمِنِينَ﴾

“Badiiwan keessan isiniif araarama, Jannata jala ishii laggeen yaa'anii fi Jannata Adn keessatti iddo jireenyaa gaarii ta'e isin seensisa. Suni Milkaa'inna Guddaadha. Wanta biraas kan isin jaallatan [isiniif kenna]-Gargaarsa Rabbiin irraa ta'ee fi baniinsa dhiyoodha. Mu'mintoota (warra amanan) gammachiisi.” Suuratu As-Saff 61:12-13

Yaa warra amantan! Wanta Rabbiin itti ajaju yoo hojjatan, badii fi cubbuu keessan isiniif haguuga, irra darba. Jannata gamoo fi mukkeen ishii jala laggeen yaa'an isin seensisa. Akkasumas, Jannata Adn (qubannaa yeroo hundaa keessa turan) keessatti iddo jireenyaa qulqulluu fi bareedaa ta'e isin seensisa. Kuni milkaa'inna guddaadha. Yaa warra amantan qananiin biraa isin jaallattan: gargaarsa Rabbii isiniif dhufuu fi baniinsa (injifanno) harka keessan irratti guuttamuudha. Yaa Nabiyyicha! Addunyaa keessatti gargaarsaa fi injifanno, Aakhiratti immoo Jannataan mu'mintoota gammachiisi.[\[3\]](#)

Kanaafu, karaa Rabbii keessatti qabsaa'un (jihaanni) ibaadaa gurguddoo keessaa tokko. Karaa Rabbii keessatti qabsaa'un haala shari'aan ajajuun diinotatti duulu, beekumsa Islaamaa babal'isuu, wanta Islaamaa fi Muslimoota fayyadu hojjachuu of keessatti qabata. Qabsoon (jihaanni) ibaadaa waan ta'eef Rabbiif qulqulleessu (ikhlaasa) barbaachisa. Qabsaa keessaa diinotaan loluun iddo guddaa qaba.

Abu Muusaa Al-Ash'aariyy (radiyallahu anhu) akkana jechuun gabaase: Qotee bulaan tokko Nabiyyi (sallallahu aleih wassallam) akkana jechuun gaafate: Namtichi tokko boojiif lola, namtichi biraa immoo akka faarfamuuf lola, namtichi sadaffaan immoo sadarkaan (gootummaan) isaa akka mul'atuuf lola. Kanniin keessaa eenyetu karaa Rabbii keessatti lolaa? Nabiyyinis (SAW) ni jedhan: **Namni jechi Rabbi ol'aantu akka taatuuf lole, inni karaa Rabbi keessatti lolaa jira.**” [Sahih Al-Bukhaari 3126](#)

Namni yommuu gara waraanaa bahuu niyyaa adda addaa qaba. Namoota kanniin keessaa namni karaa Rabbi keessatti qabsaa'a jira jedhamu nama jechi Rabbi ol'aantu akka taatuuf qabsaa'udha. Haaluma kanaan nama beekumsa baratuu fi barsiisuu kanaan wal bira qabuun ni danda'ama. Namni karaa Rabbi keessatti beekumsa barata ykn barsiisa jedhamuus nama niyyaan isaa Islaamni akka ol'aanu ta'eedha.

14-Wanta Rabbiin buuseen namoota jidduutti murteessu

Rabbitiin subhaanahu wa ta'aalaa ni jedha:

﴿وَإِنْ أَحْكَمْ بَيْنَهُمْ بِمَا أَنْزَلَ اللَّهُ وَلَا تَتَّبِعْ أَهْوَاءَهُمْ﴾

“Wanta Rabbiin buusen jidduu isaaniitti murteessi. Fedhii lubbuu isaaniis hin hordofin.” Suuratu Al-Maa’ida 5:49

15-Murtii Rabbii fi Ergamaa Isaa bira barbaadu

Rabbiin subhaanahu wa ta’alaa ni jedha:

﴿فَإِنْ تَنْرَعْتُمْ فِي شَيْءٍ فَرُدُّوهُ إِلَى اللَّهِ وَالرَّسُولِ إِنْ كُنْتُمْ تُؤْمِنُونَ بِاللَّهِ وَالْيَوْمِ الْآخِرِ ذَلِكَ خَيْرٌ وَأَحْسَنُ تَأْوِيلًا﴾

“Yoo waan tokko keessatti wal mormitan gara Rabbii fi Ergamaa deebisaa, yoo Rabbii fi Guyyaa Aakhiraatti kan amantan taatan. Kuni irra caalaa fi xumurris bareedadha.” Suuratu An-Nisaa 4:59

Yaa warra amantan! wanta tokko irratti yoo wal mormitanii fi wal dhabdan, dhugaadhaan Rabbii olta’aa fi Guyyaa Qiyaamaatti kan amantan yoo taatan, murtii wanta irratti wal mormitan kanaa gara Kitaaba Rabbii fi Sunnah Ergamaa Isaa Muhammad (SAW) deebisaa. Wanta irratti wal dhabdan gara Qur'aanaa fi Sunnah deebisuun kuni wal mormuu fi yaadan dubbachu caalaa gaariidha. Akkasumas, dhumti isaa bareedadha.

16-Wanta halaala godhee fi wanta haraama godhee keessatti Rabbiif ajajamuu, Huduuda Isaa hojii irra oolchu keessatti Rabbiif ajajamuu fi kanneen biroo Rabbiin subhaanahu wa ta’alaa kitaaba Isaa keessatti ibsee fi Ergamaa Isaa irratti buuse ibaadaa irraayyi.

Kanaafu, ibaadaan wanta Rabbiin guddaan olta’e itti ajaje hunda of keessatti qabataa jechuudha. Wanti Rabbiin olta’aan itti ajaju hundi hojii gaarii ta’eedha. Kanaafu, hojiin gaariin hundi ibaadaa keessa seena. Garuu hojiin gaariin kamiyyu ibaadaa ta’uuf nama hojii san hojjatu irraa maaltu eeggamaa? Hojii gaariin kamiyyuu ibaadaa ta’uu fi Rabbii olta’aa biratti fudhatama argachuuf ulaagaaleen sadan kunniin guuttamu qabu:

1ffaa-Namni hojii san hojjatu haala sirriin Rabbii olta’aatti fi wanta Isarraa dhufe hundatti kan amane ta’uu (iimaana sirrii qabaachu).

2ffaa-Hojii yommuu hojjatu ikhlaasa qabaachu (Rabbiti olta’af jedhe hojjachuu)

3ffaa-Haala shari’aan itti ajajeen hojjachuuudha.

Namni ulaagaalee sadan kanniin guutuun hojjate hojiin isaa ibaadaa ta’ a. Hojiin isaa ibaadaa erga ta’ e immoo Rabbal aalamina biratti mindaa guddaa argataa jechuudha. Hundemaa Rabbiin subhaanahu wa ta’alaa ibaadatti kan ajajeef faaydaa Ofiitiif osoo hin ta’ in faaydaa fi fooyya’insa gabrichaatif. Kanaafu, namni ibaadatti kan ajajameef nafsee isaa fayyaduu fi fooyyessuuf qofa akka ta’ e dagachuu hin qabu.

Kitaabban wabi:

[1] Tafsiiru Muyassar-468

[2] Al-Ubudiyyah-24-25

[3]

Tafsiiru muyassar-552

Sharih Taxhiiril Janaani wal arkaani an darani shirki wal kufraani-fuula 69-...

al-Jaami'ul Mufiid liduruusi ta'allumi tawhiidi-fuula 115-117

Date Created

February 11, 2020

Author

admin